



NARKO-NE
prevencija.ba

**Strateški
plan
Udruženja za
prevenciju
ovisnosti
NARKO-NE
2022. – 2024.**





Strateški plan Udruženja za prevenciju
ovisnosti NARKO-NE
2022. – 2024.

Sadržaj

Predgovor	5
O Udruženju – ko smo i zašto postojimo?	6
<i>Vrijednosti i principi Udruženja</i> 6	
Vrijednosti i principi Udruženja 6	
<i>Vizija i misija</i> 7	
Vizija 7	
Misija 7	
Generalni strateški cilj	7
<i>Prevenција ovisnosti</i> 8	
<i>Unapređenje zdravlja</i> 8	
<i>Problem ovisnosti u Bosni i Hercegovini</i> 8	
<i>Ciljne grupe i krajnji korisnici</i> 10	
Strateški pravci djelovanja i razvoja	11
<i>Ciljevi, rezultati i aktivnosti</i> 12	
Partneri i donatori	15
Monitoring i evaluacija	15

Udruženje za prevenciju ovisnosti NARKO-NE izradilo je ovaj Strateški plan za razdoblje od tri godine s ciljem određivanja jasnih smjernica razvoja i prioriteta Udruženja koji će biti u skladu s potrebama društva i pojedinaca.

Ovaj Strateški plan odnosi se na razdoblje od 2022. do 2024. godine i sadrži prikaz strategija i ciljeva putem kojih će NARKO-NE raditi na unapređenju prevencije ovisnosti i povećanju efikasnosti Udruženja u provođenju svojih aktivnosti.

Kao dodatak Strateškom planu, Radna grupa udruženja NARKO-NE izradit će godišnje operativne planove u koje će uključivati konkretne aktivnosti, rokove i podjele zadataka u svrhu ispunjenja strateških ciljeva.

Radnu grupu za izradu Strateškog plana činili su zaposlenici i zaposlenice NARKO-NE-a. Sam dokument usvojen je od strane Upravnog odbora Udruženja za prevenciju ovisnosti NARKO-NE, na sjednici održanoj u septembru 2021. godine.

O Udruženju – ko smo i zašto postojimo?

Udruženje za prevenciju ovisnosti NARKO-NE, sa sjedištem u Sarajevu, fokusirano je na društvene izazove vezane za sprečavanje razvoja ovisničkih i rizičnih ponašanja.

Bez produbljanja teme, moglo bi se pretpostaviti da je riječ samo o sprečavanju zloupotrebe psihoaktivnih supstanci. Međutim, misija ide mnogo dalje: ona obuhvaća prevenciju svih vrsta ovisnosti (npr. ovisnosti vezane za alkohol, pušenje, prehranu i prehrambene navike, kockanje, opsežni šoping ili korištenje društvenih medija).

Udruženje je nastalo 2002. godine i svoje projekte sprovodi na području cijele Bosne i Hercegovine, a u svojoj viziji ima zdravo društvo u kojem se djeca i mladi uspješno nose s izazovima odrastanja, te aktivno uključuju i doprinose razvoju kvaliteta života u zajednicama.

Glavna pokretačka snaga organizacije su ambasadori/ambasadorice prevencije u našem društvu, volonteri i volonterke, njih između 180 i 200 godišnje. Svi oni educirani su da kroz različite metode (teatar, novinarstvo, mentorski rad, rad s djecom i vršnjacima/vršnjakinjama itd.) ohrabre i podrže djecu i vršnjake/vršnjakinje u svojim sredinama da se odupru raznim ovisnostima, ovisničkim i rizičnim ponašanjima, te stvore zdrave alternative takvom ponašanju.

Tim NARKO-NE-a čine menadžment i zaposlenici i zaposlenice koji stručno, hrabro, mudro i strpljivo rade s djecom i mladima, saraduju s partnerskim organizacijama i institucijama, pripremaju projekte i programe koji doprinose misiji organizacije, prepoznaju potrebe i probleme mladih i djece, te su najveća podrška volonterima i volonterkama u njihovom radu.

Vrijednosti i principi Udruženja

NARKO-NE uključuje u svoje aktivnosti sve osobe bez obzira na njihovu nacionalnu, etničku, vjersku ili drugu pripadnost.

NARKO-NE djeluje pod pokroviteljstvom *Kruha svetog Ante*, humanitarno-karitativne organizacije Franjevačke provincije Bosne Srebrene i obavezuje se na zaštitu i nepovredivost ljudskog dostojanstva.

Vrijednosti i principi Udruženja

- **Prevencija ovisnosti i unapređenje zdravlja**

Mi kreiramo uslove za zdravo odrastanje. Radimo na uzrocima nastanka različitih vrsta ovisnosti, jačamo životne vještine kod djece i mladih te razvijamo sadržaje za kvalitetno provođenje slobodnog vremena.

- **Volonterizam i neformalno obrazovanje**

Za nas je volonterski rad instrument za lični razvoj i usavršavanje mladih, te model za promociju društvene odgovornosti. Volonteri i volonterke usvajaju znanje i pozitivne vrijednosti koje primjenjuju i prenose u svojim zajednicama.

- **Kvalitet života pojedinca i društva**

Naš pristup se ogleda u prepoznavanju i osnaživanju resursa i potencijala pojedinaca, u skladu s njihovim potrebama. Podstičemo aktiviranje lične motivacije, odgovornosti i izgradnju kvalitetnih odnosa koje smatramo jednim od najvažnijih faktora prevencije ovisnosti.

- **Stručnost i inovativnost**

Našu profesionalnost i inovativnost u preventivnom radu karakteriziraju: naučna utemeljenost, metode rada prilagođene ciljnim grupama i povezivanje znanja s ličnim stavovima i emocijama.

- **Umrežavanje**

Uključujemo djecu i mlade iz različitih dijelova Bosne i Hercegovine, povezujemo se s drugim vladinim i nevladinim organizacijama, te saradujemo s predstavnicima vlasti svih nivoa s ciljem poboljšanja zdravlja u društvu.

- **Kontinuiran rast i dosljednost**

Od početka djelovanja planiramo i provodimo sadržaje u skladu s našom misijom i vizijom, aktuelnim naučnim i stručnim saznanjima, kao i postojećim pravnim osnovama. Posvećeni smo razvoju i profesionalizaciji prevencije ovisnosti u BiH.

S dostupnim resursima ostvarujemo maksimalne rezultate u radu, te ih transparentno komuniciramo prema javnosti.

Vizija i misija

Vizija

Zdravo društvo u kojem se djeca i mladi uspješno nose s izazovima odrastanja, te aktivno uključuju i doprinose razvoju kvaliteta života u zajednicama.

Kratka verzija: Kvalitetan i zdrav život u BiH.

Misija

Udruženje NARKO-NE kreira i razvija volonterske programe za osnaživanje i zdrav razvoj djece i mladih, te gradi i jača kapacitete profesionalaca/profesionalki za uspješan rad na prevenciji ovisnosti i unapređenju zdravlja u BiH.

Kratka verzija: Osnažujemo djecu i mlade da zdravo društvo grade.

Generalni strateški cilj

Transformacija Udruženja sa dvadesetogodišnjim iskustvom direktnog rada s djecom i mladima u prvi stručni centar za prevenciju ovisnosti u BiH

Prevenција ovisnosti

Prevenција ovisnosti je aktivni proces koji je usmjeren na promoviranje konstruktivnih životnih stilova (ponašanja) i normi koje smanjuju mogućnost zloupotrebe droga, a istovremeno uključuje razvoj socijalnog i fizičkog okruženja koji olakšavaju usvajanje zdravih životnih stilova (Cerić, Mehić-Basara, Oruč, Salihović, 2007. godina).

Kada govorimo o prevenciji, onda razlikujemo: univerzalnu, selektivnu i indiciranu prevenciju.

Univerzalna prevencija nastoji spriječiti nastanak ovisnosti poboljšavanjem uslova života i jačanjem ličnosti. Fokusirana je na cjelokupnu populaciju i nastoji na strukturalnom (politika, medijske kampanje, institucije, infrastruktura) i individualnom (socijalno učenje, odgajanje, osjetljivost) nivou podsticati zaštitne faktore. Njena perspektiva je dugoročna.

Selektivna prevencija se bavi najranijim mogućim otkrivanjem bioloških, psiholoških i socijalnih rizičnih faktora i nastoji ih spriječiti. Primjenjuje se na lica koja su zdrava, ali u njihovim životima postoje rizični faktori čiji uticaj može dovesti do razvoja ovisnosti u budućnosti.

Indicirana prevencija podrazumijeva mjere koje su usmjerene na pojedince koji imaju rizična ponašanja, ali (još) nisu zadovoljeni dijagnostički kriteriji za ovisnost.

Unapređenje zdravlja

Unapređenje zdravlja orijentirano na ličnost i prevencija ovisnosti usmjerena na pojedinca doprinose sticanju individualnog znanja, iskustva, vještina i resursa koji sprečavaju nastanak ovisničkog ponašanja, kroz jačanje ličnosti i njene autonomije.

Unapređenje zdravlja i prevencija ovisnosti smanjuju uslove za nastanak ovisničkog ponašanja u okolini, a odnose se na zakone, životne, radne i ekološke uslove. Utiču na socijalne i društvene strukture s ciljem povećanja pozitivnih faktora i smanjenja negativnih.

Sam pojam „unapređenje zdravlja“ nastao je kao oznaka za zdravstveno-politički akcioni program radi postizanja zdravstvenih ciljeva *Zdravlje za sve 2000*. Ciljevi i principi unapređenja zdravlja razvili su se početkom 1980-ih godina, u Evropskom regionalnom uredu Svjetske zdravstvene organizacije (WHO), a objedinjeni su 1986. godine u Otavskoj povelji o unapređenju zdravlja. Povelja se smatra novim poglavljem za *New Public Health* (Novo javno zdravstvo).

Problem ovisnosti u Bosni i Hercegovini

Današnje generacije djece i mladih odrastaju u vremenu u kojem su izloženi različitim supstancama i pojavama koje izazivaju ovisnost ili su rizične za njihov zdrav razvoj. Poznato je da su adolescenti, zbog specifičnosti razvojne faze, sklonosti rizicima i eksperimentiranju, najrizičnija grupa za usvajanje i razvoj ovisničkog ponašanja. Za adolescenciju je karakteristična želja za samopotvrđivanjem i izgradnjom vlastitog identiteta, pri čemu iz radoznalosti, potrebe za imitiranjem ili pod pritiskom vršnjaka postoji veliki rizik od eksperimentiranja s različitim sredstvima koja izazivaju ovisnost.

Iako se s riječju *ovisnost* najviše povezuje ovisnost o opojnim drogama, alkoholu i pušenju, postoje i tzv. ponašajne ovisnosti (patološko kockanje, ovisnost o videoigrama, ovisnost o internetu, patološko kupovanje itd.).

Istraživanje koje su proveli Udruženje za prevenciju ovisnosti NARKO-NE i Kantonalna javna ustanova Porodično savjetovalište Sarajevo, *Putokazi u zdravlje društvo*¹ usmjereno na kockanje i upotrebu interneta, te navike konzumiranja alkohola, cigareta i marihuane kod djece i adolescenata, i načine provođenja slobodnog vremena mladih pokazalo je da:

- Najčešće aktivnosti djece i mladih u slobodnom vremenu su druženje s prijateljima i bavljenje sportom, a potom slijede slušanje muzike i pretraživanje interneta, dok su manje zastupljeni gledanje televizije, čitanje i spavanje;
- Veoma mali postotak ispitanika koji najradije čita u slobodno vrijeme govori da kod djece nije dovoljno razvijena navika čitanja, čemu zasigurno doprinosi upotreba savremenih tehnologija, a negativni uticaj razvoja tehnologije na naviku čitanja knjiga i posljedice tog uticaja bit će interesantna tema za istraživanje u budućnosti;
- Postotak djece i mladih koji smatra da svoje slobodno vrijeme ne provodi dovoljno kvalitetno je zabrinjavajući, te, ako uzmemo u obzir činjenicu da su pubertet i adolescencija period eksperimentiranja, postoji velika mogućnost da ova populacija, u nedostatku kvalitetnih sadržaja za provođenje slobodnog vremena, može posegnuti za nekim sredstvima koja izazivaju ovisnost, ili se može početi ponašati rizično, što upućuje na to da je potrebno provođenje preventivnih aktivnosti upravo za ovu populaciju;
- Postotak učenika koji najradije pasivno provodi slobodno vrijeme (slušajući muziku, pretražujući internet, gledajući televiziju i spavajući) upućuje na to da je slobodno vrijeme mladih nedovoljno osmišljeno i organizirano, iz čega proizlazi da je djecu i mlade potrebno educirati o važnosti i načinima kvalitetnog provođenja slobodnog vremena, te da je potrebno pronaći zanimljive alternativne načine da se mladi privuku i uključe u te aktivnosti. Također, s obzirom na to da nekontrolirano i nekvalitetno provođenje slobodnog vremena često dovodi do različitih neprihvatljivih ponašanja, potrebno je raditi i s roditeljima, odnosno upozoravati ih o ovim mogućim štetnim posljedicama, te osvještavati ih o važnosti kvalitetnog provođenja slobodnog vremena njihove djece. Pored toga, roditeljima treba skrenuti pažnju i na to da je potrebno da i sami doprinesu kvalitetnijem provođenju slobodnog vremena svoje djece kroz poticanje kreativnosti koja je, pod pritiskom školskih obaveza i zbog nedostatka vremena, često sputana i neizražena. Škola, također, ima posebnu ulogu u vaspitanju djece i mladih i upućivanju u kvalitetne načine provođenja slobodnog vremena i trebala bi u većoj mjeri podsticati razvoj stvaralaštva i voditi računa o vannastavnim aktivnostima učenika;
- Ono što djeci i mladima najviše nedostaje u njihovom mjestu stanovanja, da bi njihovo slobodno vrijeme bilo kvalitetno ispunjeno, jesu mjesta za okupljanje i organizirane aktivnosti za mlade, što također upućuje na potrebu organiziranja preventivnih aktivnosti kroz koje će se poticati kreativnost i aktivizam kod mladih;

¹Putokazi u zdravlje društvo, Istraživanje o kockanju i korištenju interneta, te navikama konzumiranja cigareta, alkohola i marihuane među djecom i mladima u tri kantona Federacije Bosne i Hercegovine, Sarajevo, 2016.

- Prema mišljenju ispitanika, najveći problem djece i mladih predstavlja prekomjerna upotreba interneta, a zatim slijede pušenje cigareta, pušenje marihuane, kockanje, konzumiranje alkohola, te pušenje nargile.

Ciljne grupe i krajnji korisnici

Ciljna grupa (direktni uticaj aktivnosti: oni koji imaju korist kratkoročno)	Krajnji korisnici (drugi ljudi koji imaju korist dugoročno)	Ključni partneri (oni koji na određeni način učestvuju, doprinose, utiču ili imaju interes)
<p>Profesionalci/profesionalke u radu s djecom i mladima u obrazovanju, zdravlju, socijalnoj zaštiti, sigurnosti i aktivnostima u slobodnom vremenu</p> <p>Donosioci odluka na svim nivoima uključeni u oblast prevencije ovisnosti</p> <p>Mediji</p> <p>Roditelji</p>	<p>Djeca i mladi u BiH</p> <p>Nastavno i stručno osoblje u školama, ustanovama socijalne i zdravstvene zaštite</p> <p>Članovi i članice drugih nevladinih organizacija</p> <p>Stanovnici/stanovnice lokalnih zajednica</p>	<p>Vladine institucije</p> <p>Ustanove socijalne zaštite</p> <p>Obrazovne institucije</p> <p>Zdravstvene institucije</p> <p>Sigurnosne institucije</p> <p>Domaće nevladine organizacije</p> <p>Međunarodne vladine i nevladine organizacije</p> <p>Donatori</p>

Generalni strateški cilj:

Transformacija Udruženja sa dvadesetogodišnjim iskustvom direktnog rada s djecom i mladima u prvi stručni centar za prevenciju ovisnosti u BiH

Ključni strateški pravci:

- Unaprijediti rad na prevenciji ovisnosti i očuvanju zdravlja kroz iniciranje i provedbu naučno utemeljenih i dokazano djelotvornih pristupa i intervencija
- Koristiti teoretsku pozadinu i argumentaciju za uspostavljanje programa u šest ključnih okruženja za pozitivnu socijalizaciju djece i mladih:
 1. Mikro okruženje škole, porodice i radnog mjesta
 2. Makro okruženje zajednice, životne sredine i medija
- Kontinuirano raditi evaluacije učinkovitosti provedenih intervencija, te vršiti adaptacije
- Usvojeni koncept stručnog centra kontinuirano predstavljati i promovirati ka donosiocima odluka na svim nivoima
- Zagovarati usvajanje odluke za finansiranje dijela troškova stručnog centra prema Vijeću ministara BiH
- Lobirati i zagovarati za ostvarivanje profesionaliziranja sistema prevencije ovisnosti u BiH

Ciljevi, rezultati i aktivnosti

GENERALNI STRATEŠKI CILJ: Transformacija Udruženja sa dvadesetogodišnjim iskustvom direktnog rada sa djecom i mladima u prvi stručni centar za prevenciju ovisnosti u BiH	
Generalni cilj I Raditi na izgradnji uslova za sigurno i zdravo odrastanje djece i mladih, te povećati svjesnost građana/građanki o značaju kvalitetne prevencije ovisnosti	Generalni cilj II Nastaviti razvijati i profesionalizirati sistem prevencije ovisnosti u BiH
Specifični ciljevi	
Pilotirati naučno utemeljene intervencije u šest primarnih okruženja (škola, porodica, radno mjesto, zajednica, životna sredina i mediji)	Povećati kapacitete donosioca odluka i praktičara u oblasti kvalitetne i naučno utemeljene prevencije ovisnosti u BiH
Adaptirati i multiplicirati djelotvorne intervencije u najmanje dvije regije u državi	Inicirati i zagovarati provođenje epidemioloških istraživanja u vezi s rizičnim ponašanjima mladih s posebnim fokusom na probleme ovisnosti
Provoditi medijske kampanje na teme prevencije alkohola i učešća u igrama na sreću	Kreirati sistem za održivost kvalitetnih i djelotvornih prevencijskih programa

GENERALNI CILJ I: Raditi na izgradnji uslova za sigurno i zdravo odrastanje djece i mladih, te povećati svjesnost građana/građanki o značaju kvalitetne prevencije ovisnosti			
SPECIFIČNI CILJEVI	STRATEGIJE	AKTIVNOSTI	REZULTATI
Cilj 1.1: Pilotirati naučno utemeljene intervencije u šest primarnih okruženja (škola, porodica, radno mjesto, zajednica, životna sredina i mediji)	Koristiti evropske i svjetske registre unutar kojih se nalaze opisane intervencije koje su dokazano djelotvorne	Provesti sljedeće pilot intervencije: 1. <i>Strong families</i> i <i>Families United</i> (porodične intervencije) 2. <i>Tko zapravo pobjeđuje?</i> (prevencija kockanja srednjoškolaca) 3. <i>Osamostaliti se</i> (životne vještine djece prvog-četvrtog razreda osnovnih škola) 4. <i>Preventeen</i> i <i>Fit4life</i> (intervencije za mlade u slobodnom vremenu) 5. Lokalne alkoholne politike (okolinske intervencije) 6. Zdravo radno okruženje za sve (intervencije na radnom mjestu) 7. Razviti i druge intervencije od značaja za korisnike	Pilot intervencije direktno obuhvatile najmanje 100 porodica u BiH, te najmanje 1000 djece i mladih Najmanje 4 jedinice lokalne samouprave usvojile politike za reguliranje marketinga alkohola
Cilj 1.2: Adaptirati i multiplicirati djelotvorne intervencije u najmanje dvije regije u državi	Koristiti rezultate evaluacije pilot intervencija i prilagoditi potrebama određene ciljne grupe	Dokazano učinkovite intervencije implementirati u najmanje dvije geografske regije BiH (npr. istočna Bosna, istočna Hercegovina, zapadna i sjeverna Bosna i sl.)	Multiplicirane intervencije obuhvatile najmanje 50 porodica i 500 djece i mladih
Cilj 1.3: Provoditi medijske kampanje na teme prevencije alkohola, drugih supstanci i učešća u igrama na sreću	Medijske kampanje zasnovane na teorijama s ubjeđivačkim pristupom a ne samo informativnim	U 2022. godini provesti kampanju prevencije učešća u igrama na sreću U narednim godinama provesti kampanje na temu alkohola i drugih supstanci	Kampanjama direktno obuhvaćeno najmanje 100.000 osoba u BiH

GENERALNI CILJ II: Nastaviti razvijati i profesionalizirati sistem prevencije ovisnosti u BiH			
SPECIFIČNI CILJEVI	STRATEGIJE	AKTIVNOSTI	REZULTATI
Cilj 2.1: Povećati kapacitete donosioca odluka i praktičara u oblasti kvalitetne i naučno utemeljene prevencije ovisnosti u BiH	Koristiti globalna saznanja i dokaze o djelotvornim pristupima u prevenciji	Sprovesti najmanje 10 obuka iz Evropskog prevencijskog kurikuluma (EUPC)	Najmanje 200 donosioca odluka i praktičara iz BiH unaprijedilo znanje o efikasnim i neefikasnim pristupima u prevenciji
Cilj 2.2: Inicirati i zagovarati provedbe epidemioloških istraživanja u vezi s rizičnim ponašanjima mladih s posebnim fokusom na probleme ovisnosti	Na stručnim konferencijama planirati učešće domaćih i međunarodnih stručnjaka te zagovarati provedbu istraživanja u BiH	U saradnji s Evropskim centrom za praćenje droga i ovisnosti o drogama (EMCDDA) biti domaćin 14. stručne konferencije Evropskog društva za prevencijska istraživanja u 2023. godini	Najmanje 200 domaćih i međunarodnih stručnjaka postavilo temelje za kvalitetna epidemiološka istraživanja u vezi problematike ovisnosti
Cilj 2.3: Kreirati sistem za održivost kvalitetnih i djelotvornih prevencijskih programa	Upoznati se s uspješnim sistemima prevencije u svijetu	Iniciranje i zagovaranje: 1. izrade postupka i kriterija za akreditaciju naučno utemeljenih programa prevencije ovisnosti u BiH 2. izrade registra akreditiranih programa prevencije ovisnosti 3. izrade kriterija za finansiranje akreditiranih programa prevencije ovisnosti i njihovu evaluaciju	Kreiran transparentan i održiv sistem kvalitetnih programa prevencije ovisnosti u BiH

Partneri i donatori

Udruženje za prevenciju ovisnosti NARKO-NE nastoji stvoriti mrežu relevantnih organizacija i pojedinaca / profesionalaca kako bi zajednički djelovali u ostvarivanju misije ovog udruženja. Na ovaj način, Udruženje saradničke organizacije uključuje participativno u planiranje, organiziranje i provođenje projekata prevencije ovisnosti s različitim ciljnim grupama.

NARKO-NE će se truditi u budućem radu nastaviti ostvarenu i uspostavljati novu saradnju s različitim organizacijama i donatorima kroz:

- Konsultacije s relevantnim ministarstvima i komisijama za droge oba entiteta
- Aktivno zagovaranje za ostvarivanje profesionalizacije sistema prevencije ovisnosti u BiH
- Praćenje savremenih trendova usavršavanja edukatora/edukatorica i ponudu usavršavanja partnerskim organizacijama
- Uključivanje novih ciljnih grupa u aktivnosti Udruženja kao saveznika
- Prezentiranje rada i uspjeha Udruženja
- Sudjelovanje na konferencijama i stručnim skupovima
- Povećanje vidljivosti Udruženja u BiH, ali i regiji

Kao ključne partnere u radu Udruženje, na lokalnom nivou, prepoznaje vladine institucije, ustanove socijalne zaštite, obrazovne institucije, domaće nevladine organizacije, međunarodne nevladine organizacije, domaće i strane donatore, te eksterne saradnike.

Na državnom i entitetskim nivoima to su nadležna ministarstva iz oblasti sigurnosti, socijalne politike, zdravstva i obrazovanja.

NARKO-NE će i dalje razvijati saradnju sa stručnim institucijama i organizacijama u regiji, te s partnerima u EU i šire koji kreiraju inovativne pristupe u radu na prevenciji ovisnosti i unaprjeđenju zdravlja.

Monitoring i evaluacija

Za realizaciju Strateškog dokumenta odgovorni su izvršni direktor i Upravni odbor Udruženja. O provođenju Strateškog plana direktor će izvještavati članove Upravnog odbora na sastancima Upravnog odbora, a po potrebi i češće ili vanredno ukoliko članovi Upravnog odbora to zatraže. Za implementaciju konkretnih aktivnosti će biti zaduženi zaposlenici Udruženja, raspoređeni po odgovornostima. Realizacija Strateškog plana će biti praćena putem godišnjih izvještaja u kojima će biti definirani glavni uspjesi i nedostaci u provođenju aktivnosti iz ovog dokumenta, na osnovu čega će se donijeti odluka o potrebi za adaptacijom i revizijom plana implementacije.





NARKO-NE

Udruženje za
prevenciju ovisnosti

Josipa Vancaša 21, 71000 Sarajevo, Bosna i Hercegovina

Tel: +387(0)33 215 088

Tel/fax: +387(0)33 223 285

Email: narkone@prevencija.ba

Web: www.prevencija.ba

Facebook NARKO NE Udruženje za prevenciju ovisnosti

Instagram: [prevencija_ba](https://www.instagram.com/prevencija_ba)

Linkedin: Udruženje za prevenciju ovisnosti NARKO-NE

